

**Ọkwukwo izi Pọlu
gbaznennu
Ele Rom
Nhne gbasiri ọkwukwo izi ka**

Ọkwukwo izi Pọlu gbaznennu ele Rom bụ ma be jikneru ọ nabnanya Pọlu nụ Rom. Echiche a bụ ma ọ rny ọnu n'esilawuru be ige matị, hite n'oyi aka be, o zne Sipeni. Ọkwukwo izi ele Rom neegesi kpa Chiokike nọgwnu ele badny ele ikpe mana, mee ya nụ be ziri n'udno. Chiokike mernu ele badny nụ a ziri n'udno hite n'okwnata mkpoma ke zị nụ Jizọsi Karaịsi. Nye Karaịsi ọbula nwernu udno kwnornu nụ Chiokike mernu badny nwernu ẹhni a, whoga nụ rikne ke mmehie nụ ẹnwu. Pọlu kwuru nụ ele Ju nụ ele bụo ele Ju nwernu igwe n'oru Chiokike hite nụ Jizọsi Karaịsi.

Nhne zị n'ọkwukwo ka

Ọpanizo (1:1-17)

Ọznohia hite nụ mmehie zị mkpa (1:18--3:20)

Apna Chiokike kwnornu ọznohia (3:21--4:25)

Budnu ikne nụ rime Karaịsi (5:1--8:39)

Izireli zị nụ mmuma Chiokike (9:1--11:36)

Agwa nye Karaịsi (12:1--15:13)

Ọkwukwo nụ obekwu ikwu (15:14--16:27)

¹ Mawa Pọlu, nye izi Karaịsi Jizọsi, nye Chiokike sukwuru, ma m bụru m nye izi Jizọsi, hohia masị a ma m bụru m nye zni izi oma a, naagba ọkwukwo izi ka. ² Ka bụ izi oma Chiokike kweru mkwna ogologo ige wheru ewhe hite n'ọnu ele ọwhnurninya,

lele kpa be gbarụ a n'okwukwo nsọ. ³ Izi ọma ka gbasiri Nnwọ a, Nyenwe aị Jizọsi Karaịsi, nye ghoru badnụ, be mụ a n'avnurnu Devidi. ⁴ Chiokike gesiri nụ Jizọsi Karaịsi bụ Nnwọ a, nga o mernu o hi n'enwu lizọ hite nụ rikne ke Enine Nsọ. ⁵ Hite n'aka a, Chiokike nyernu aị oru ọ bụru ele izi kwnornu Karaịsi, ma a sukwu kpakara mba ma be kweru nụ ya, bno a masi nsni. ⁶ Kpakara anụ ele zị nụ Rom, zị n'esilawuru ele Chiokike sukwuru ma be bụru ke Jizọsi Karaịsi. ⁷ M naagbanụ anụ ele zị nụ Rom okwukwo, ele Chiokike whnurnu n'anya, sukwu ma be bụru ele ke a,

Oru nụ udno ke Chiokike Nda aị nụ Nyenwe aị Jizọsi Karaịsi dazinu anụ.

Okpukpe ọtu mmamma

⁸ Ke mbom, m nọtunu Chiokike mmamma hite nụ Jizọsi Karaịsi kwnornu anụ, nụ okwnata mkpoma anụ gazuru ọwa. ⁹ Chiokike, nye me ji kpakara mkpoma m naakwanụ, hite n'okpo okwo izi ọma Nnwọ a, bụ nye akebne m, nụ m neechenwanya anụ ige ọbula. ¹⁰ Ige ọbula me neekpe okpukpe, m nọorio Chiokike ma hite n'echiche ọma a, o nyee m oghere me va lekasi anụ.

¹¹ Kwnornu nụ m pioru m ọ whnụ anụ anya ma me nụ anụ kerị ngozi ke enine, ke jeeme anụ gwuzosi rikne. ¹² Ke bụ me va, a kasirita ẹhni aị ovu, okwnata ovu m jaakasi anụ ovu, okwnata anụ jaakasi m ovu. ¹³ Rụmu nda m, m pioru anụ mahia nụ agida ige, m pioru m ọ va lekasi anụ, kovu m nwée m rikne dụ kịna. M pioru m o rihia mkpuru ovu n'esilawuru anụ lele kpa me rihiaru mkpuru ovu n'esilawuru ele bụo ele Ju. ¹⁴ Kwnornu nụ m ji

m kpakara ele badnu ọgwo ọkpo okwo izi ọma, ma ele Giriki, ma ele búo ele Giriki, ele nwernu akọ, ma ele nwée akọ. ¹⁵ Ke bu nu o zi m mkpa o zni anu ele zi nu Rom izi ọma.

Iknerne ma ke izi ọma

¹⁶ Iwhnerne izi ọma ka zá nọotu m, o bu rikne Chiokike du ọznohia kpakara ele kweru, ele Ju ke mbom, nu ele búo ele Ju. ¹⁷ Kwnornu nu ome mma ke Chiokike whuyaru iwhne n'izi ọma, hite n'okwnata ovu du okwnata ovu, lele kpa be gbaru a n'okwukwo nsọ, “Nye mee mma jeehi nu okwnata ovu a ziri budnu.”

Onuma Chiokike megidne badnu

¹⁸ Kwnornu nu ovu owe ehi Chiokike hiri n'oligwe whuya iwhne megidne kpakara ele máa Chiokike, ele hi nu risi rikne aruru-eli be naak-pagidne ezi oka. ¹⁹ Chiokike neewe ehi megidne be, kwnornu nu nhne be kwesiri o mahia gbasiri Chiokike whuyaru iwhne. O bu Chiokike n'iwhuru a gesiri be ehi a. ²⁰ Hite n'okike ọwa, nhne be whnu anya gbasiri Chiokike, nu rikne a zi okwnukokwnu, nu oyiyi a zi nsọ bu ke badnu whnu anya, be whnu be nu kpakara nhne Chiokike keru, ke bu nu badnu nwée nhne o ji gonahoru ehi a.

²¹ Be marnu Chiokike, kovu be nyene a igwugwu kwesiri a, be tu mmamma, kovu echiche be bu nhne etekne, mkpoma iwhnirniwhno be jiharu n'ochichiri. ²² Be kaa nu be bu ele nwernu akoniche, be bu ele iwhnirniwhno. ²³ Tnnuma be jaakwanu Chiokike ke nwu onwu, be nokpo risi eli nyee nhne

be pñiornu ọpniọ lele badnụ ke nọonwu ọnwu, nụ ọnunu, nụ anọhia nụ agwọ.

²⁴ Chiokike gweru be nyewhete n'aka nhne zila richna hite nụ ome nhne ovu ojo be pioru, be gweru ẹhni be mee nhne tị iwhnerne n'esilawuru ẹhni be. ²⁵ Be gweru aghalaghala gbanwo ezi ọka Chiokike, be nọokpo risi ẹli nyee nhne be keru eke tñunuma nye keru nhne n'iwhuru a, nye nwe ọznarni ọkwnukokwnu. Amim.

²⁶ Kam kpayarụ, Chiokike nyernu be n'aka ome nhne tị iwhnerne. Ele rinya gharụ o mee nhne lele kpa omen'ẹli omekọrita nyerukna nụ nyerinya zị, be be neemekọrita. ²⁷ Kpam masị, ele rukna sigbasiri ọ dnanyi ele rinya, be naadnanyitaru ẹhni be. Be neeme nhne tị iwhnerne n'esilawuru be, be naata awhnụwhnu nhne ojo be mernu.

²⁸ Kpa be kwéle ọ marnụ Chiokike nụ mkpọma be, Chiokike nyewhete be n'aka ovu ruru ọru, ma be mee nhne be kwésile o mee. ²⁹ Aruru-ẹli zị ọdo nụ ọdo jihiaru mkpọma be, mmehie, ọwho-anya, okne nhne ojo, ntaknarnama ovu, ogbu badnụ, ọlu ọgwnu, aghigho, nụ osno irno, ozno izno. ³⁰ Ele naakaja ẹhni be, be snornu Chiokike irno, ele sọ anya, ele noolu ọnu, ele neechehia apna ikne kpa be jeeme nhne ojo, ele zá noobnonu ele murnu be nsni, ³¹ ele nwée ọghohia, ele zá naabita ọgba-njọ-ẹhni, ele nwée ovu ọma, ele zá nọdonu ele berere obirizi. ³² Be magwụ nụ iwu Chiokike kwuru nụ ele neeme nhne ojo ka jọonwu ẹnwu, ọ bụo nụ be neeme nhne ele ka kpọi, kọvu be naadasinu ele neeme nhne ele ka n'ikwnu.

2

Ikpe zị snam ke Chiokike

¹ Jị badnu, i nwée rikne gónahoru ẹhni i, jị nye neekpe nye berere ikpe, kwnornu nù hne i zị neekpe nye berere ikpe bụ hne ikpe zị naama i, kwnornu nù i neeme otu nhne wam. ² A magwu nù Chiokike neekpe ikpe zị snam nù risi ele neeme kpakara nhne ka. ³ Jị badnu etekne ke neeme nhne ke i kwno neekpe ele berere ikpe, i che nù i jaagbanahoru ikpe Chiokike sa? ⁴ Mọbu i neeledna okne ovu ọma Chiokike anya, nù ọnabnanya a, nù ogologo ọsnuta ovu a? N'ezi, Chiokike neemenu i nhne ọma ka ma o dubna i nù ọtuhnasna ovu. ⁵ Kọvu hite nù ovu rikne nù ovu kwé ọbniaji i, i naabitanu ẹhni i awhnuwhnu ke kakwo n'ọbochi ovu owe ẹhni Chiokike nù okpume ikpe a zị snam. ⁶ Chiokike jọkwu nye ọbula ọgwo lele kpa ẹrnu a jiri zị. ⁷ Ele gwuzosi rikne neeme nhne ọma, noopio igwugwu nù ọsobisi, nù nkọli bụdnu, Chiokike jeenye be bụdnu kwó okwo. ⁸ Kọvu, ele noopio nhne ke aka be, ele kwéle ezi ọka, ele noosno nhne ojo, Chiokike jọowukwasi be ovu owe ẹhni a nù ọnuma a. ⁹ Okne awhnuwhnu nù nhne igbugbu jaazinu kpakara ele neeme nhne ojo, ke mbọm ele Ju, ma ele bụo ele Ju. ¹⁰ Kọvu igwugwu, ọsobisinu nù udno jaazinu nye ọbula neeme nhne ọma, ke mbọm ele Ju, nù ele bụo ele Ju. ¹¹ Kwnornu nù Chiokike zá neele badnu anya nù ruwhnu.

¹² Kpakara ele mernu mmehie hne be nwée Iwu Mozizi jọonwu hne Iwu zila, ele mehieru hne Iwu zị, Iwu jeekpe be ikpe. ¹³ O bụo ele nọonu Iwu bụ ele zị snam nù ruwhnu Chiokike, kọvu ele neeme

nhne Iwu kwuru. ¹⁴ Nga ele búo ele Ju ele nwée Iwu hiri n'ovu be mee nhne Iwu kwuru, kam búnu be Iwu, ọ bú n'ezi nù be nwée Iwu. ¹⁵ Búdnú be neegesi nù be gbagwù Iwu n'ovu be, ovu be naagbanù be akebne, noobno be nhne, mọbu nọogomanu be. ¹⁶ Ka jọobu n'ọbochi Chiokike jeekpe nhne tugwaru otugwa ke badnù ikpe, hite n'aka Karaịsi Jizọsi lele kpa izi ọma me neezni kwuru.

Ele Ju nù Iwu

¹⁷ I noosukwu ẹhni ị nye Ju, nọotukwasi ovu n'Iwu, neeji Chiokike naanya risi. ¹⁸ Ị magwù echiche a, i nahọru nhne ke kakwo mma, kwnornu nù ị mụhiaru a n'iwu. ¹⁹ Ị kwnatarù ovu nù i bú nye noodu nye isni, iwhne ele zị n'ọchichiri, ²⁰ nye neezni ele iwhnirniwhno nhne, nye neezni rụmu takiri nhne, nye nwegwu akọniche zuru ozu, nù ezi ọka. ²¹ Jị nye neezni ele berere nhne, i zní ẹhni i nhne sa? I neezni ọ zá nye znu buznu, jị n'iwuhuru i znú buznu sa? ²² Ị kaa, “Ọ zá nye mee ọyi,” jịwa, i méé ọyi sa? I snornu chi berere irno, kọvu i znú buznu nù ruwhnu rẹnwu? ²³ Jị nye jị iwu Chiokike noolu ọnu, ọ bú ị zá neeme Chiokike nhne iwhnerne hite n'olulu iwu a? ²⁴ Lele kpa be gbarù a n'ọkwukwo nsọ, “Ele búo ele Ju naakaja rẹwhna Chiokike kwnornu anù ele Ju.”

²⁵ Ọ búru nù ị bíta iwu, ọkpa nka ị bú nhne, kọvu ọ búru nù ị bítage iwu, ọkpa nka ị bú nhne etekne. ²⁶ Ọ búru nù ele búo ele Ju be kpáge nka, bíta Iwu, be jeegweru be lele ele be kparù nka. ²⁷ Nye be kpáge nka n'anọ-ẹhni kọvu ọ bítaru Iwu jaama ị ikpe, jị nye nwegwu Iwu be gbarù n'ọkwukwo nù nye be kparù nka, kọvu ị zá naabíta Iwu. ²⁸ Badnù

búo nye Ju n'anọ-ẹhni kpọi, ọkpa nka búo masị ke anọ-ẹhni kpọi. ²⁹Nye Ju n'ezị bú nye Ju n'ovu. Ọkpa nka bú ke be kparụ n'ovu hite n'enine Chiokike, ọ búo n'Iwu be gbarụ n'ọkwukwo. Ọznarni badnụ wam híge n'aka badnụ, kọvu n'aka Chiokike.

3

Chiokike kwesiri ọ kwnata ovu

¹ Kìni bú nhne ele Ju nwernu kakwo ele búo ele Ju? Ọ zị mbnarna zị nụ ọkpa nka? ² Owe! K'agida n'apna ọbula. Ke mbom, Chiokike nyernu ele Ju ikwu-onu a. ³ Ọ búru nụ agwna be nwée ọkwnata ovu? O jeeme Chiokike búru nye kwésile ọ tụtkwasi ovu? ⁴ Ọza rịa rịa! Chiokike jọoburiri nye ezi ọka, ọ búbedi nụ kpakara badnụ jọoburu ele aghalaghala. Lele kpa ọkwukwo nsọ kwuru,

“Ma i gesi nụ ì bú nye nookwu ezi ọka,
Ikpe jáama ì nga be neekpe i ikpe.”

⁵ Ọ búru nụ a mernu nhne búo ọma, ke jeegesi ome mma Chiokike ke zị snam, kịni bú nhne a jookwu? Nụ Chiokike mernu nhne ojo nụ ọ ta aì awhnụwhnu nụ ovu owe ẹhni sa? (M nookwu lele badnụ etekne.) ⁶ Ọza rịa rịa! Ọ búru nụ Chiokike búo nye mee mma, ndaa kpa o jeeji kpe ọwa ikpe? ⁷ Ọ búru nụ aghalaghala m jeenye Chiokike igwugwu hite nụ ome ezi ọka a whuya iwhe, ndaa kpa be jaama m ikpe lele nye mmehie? ⁸ Ọ búru nụ anụ neeche kpam, anụ jaakaa, “Ngwa ma a mee nhne ojo ma nhne búru ọma va”? Agwna ele badnụ nyernu m mkparị, noobno m nụ ka bú nhne me

neezni ele badnu. Be jaama be ikpe lele kpa o kwesiri.

Nye mee mma zá

⁹ Ndaa, a ka ele búo ele Ju mma? Óza rĩa rĩa. M karu m nu ele Ju ma ele búo ele Ju n'otu zi nu mkpururu mmehie. ¹⁰ Lele kpa okwukwo nsokwuru,

“O zá nye bu nye mee mma, o bubedi otu.

¹¹ O zá nye nwernu akoniche,
o zá nye noopio Chiokike.

¹² Kpakara ele badnu dasinnu Chiokike aznu,
o zá iru be bnarnu,

o zá nye neeme nhne oma
o bubedi otu.

¹³ Onu be nu lele ilili gberu anya,
riro be nookwu oka aghigho,
oka ojo lele njulu agwo neehi nu mgbele-onu
be whuya.

¹⁴ Ovu onu nu okne onu ojo jiharuru be nu mkpoma.

¹⁵ Ochi be zi snarna snarna n'owusa onarna.

¹⁶ Olulu nhne nu nhne anya-mini noosno be
n'apna be.

¹⁷ Be máa apna udno.

¹⁸ Ogwenu Chiokike zá be n'anya.”

¹⁹ Kitna a magwu nu kpakara nhne Iwu kwuru zinu ele zi nu mkpururu Iwu, ma be kpusni kpakara onu ele badnu, ma kpakara owa bna n'ikpe Chiokike. ²⁰ Kwnornu nu o zá nye mee mma n'anya Chiokike hite nu ome nhne Iwu kwuru, kovu Iwu neeme ele badnu mahia nu be mehieru.

*Ome mma hite
n'okwnata mkpoma*

²¹ Kọvu ome mma Chiokike whuyaru iwihne hne Iwu zila, o bu ezi oka nu Iwu nu ele owhnurninya naagbanu a akebne. ²² Ome mma Chiokike ka hiri n'okwnata ovu nu Jizosi Karaisi zinu kpakara ele kwehjaru, kwnornu nu okpa ike zila nu rime a rja rja. ²³ Kwnornu nu kpakara ele badnu mehieru, be nwée rikne du igwugwu Chiokike. ²⁴ Kọvu nkesi ke oru Chiokike mernu kpakara badnu buru ele ikpe mama hite n'ogbahia a ke hi n'aka Karaisi Jizosi. ²⁵ Chiokike nyernu a lele nkesi owhaji-eli hite n'okwnata ovu, ka bu ma Chiokike gesi ome mma a. N'ige wheru ewhe Chiokike jiri ogologo osnuta ovu lewhuru mmehie ke badnu anya. ²⁶ O mernu kam ma o gesi ikpe a zi snam n'ige ka, ma o buru nye mee mma nga o neegweru badnu lele nye ikpe mama hite n'okwnata ovu nu Jizosi.

²⁷ O buru kpm, ndaa hne mpako zi? O zila! Kini kpyaru a? O bu nu hite n'obita nhne Iwu kwuru? Oza! Kọvu a kwnataru ovu. ²⁸ A nookwusi a rikne nu be neegweru badnu lele nye ikpe mama hite n'okwnata ovu, o buo hite n'ernu ke Iwu. ²⁹ Chiokike, o bu Chiokike ke ele Ju kpoi? O buo Chiokike ke ele buo ele Ju sa? Owe! O bu ya. ³⁰ Hne o bu otu Chiokike, o jogwnu ele be kparu nka lele ele ikpe mama hite n'okwnata ovu be, nu ele be kpala nka hite n'okwnata ovu be. ³¹ A jaaka nu ka neegesi n'Iwu bnage nu nhne hite n'okwnata ovu ka? Oza rja rja, kọvu a neeme Iwu gwuzosi rikne.

4

Okwnata ovu Ebereham

¹ Ndaa nhne a jaakaa gbasiri Ebereham nda aị? Kịni bụ nhne o piohịaru? ² Ọ bụru nụ be hiri n'ernu Ebereham gwnụsi a nụ nye mee mma, o znernu anyaa risi nụ ka. Kọvu o nwée rikne mee oknomokno nụ ruwhnu Chiokike. ³ Ọkwukwo nsọ kwuru kịni? “Ebereham kweruru Chiokike, Chiokike gwnụsinu a nụ ọ bụ nye mee mma.” ⁴ Nye be kwuru ọgwo ernal, ọgwo ernal a bula nkesi, kọvu nhne ọ rnuhıaru n'ernal. ⁵ Kọvu nye rnuge ernal, ke kwnataru Chiokike, nye nọogwnu ele ojo lele ele ikpe mana ovu, Chiokike ji okwnata ovu a gwnu a nye mee mma. ⁶ Ka bụ nhne Devidi kwuru gbasiri nye ọwa ọma, nye Chiokike hige n'ernal a gwnu nụ nye mee mma,

⁷ “Nye ọwa ọma bụ nye Chiokike gbarunu mmehie, nye be kpusnirni aruru-eli a.

⁸ Nye ọwa ọma bụ nye Chiokike zá nọogwnu mmehie a megidne a.”

⁹ Ngozi ka, ọ zinu ele be kparu nka kpọi sa? Óza, ma ele be kpála nka. Kwnornu nụ a karu nụ Ebereham kweruru Chiokike, Chiokike gwnụsinu a nụ ọ bụ nye mee mma. ¹⁰ Ndaa hne nhne ka mernu? Ọ nga be kparu a nka, sụ ọ bụ nga be kpála a nka? Ọ bụ nga be kpála nka. ¹¹ Be kparu a nka ma ọ bụru nhne elekema ke ome mma nụ ọ kwnataru Chiokike ovu nga be kpála a nka, ma ọ bụru nda kpakara ele kweru, ma be gwnụsi be n'ele mee mma, ọ bụ n'ezi nụ be kpála be nka. ¹² Ọ bụ masi nda ele be kparu nka, ọ bula nụ be kparu be nka kpọi, kọvu nụ be noowu budnu okwnata ovu lele nda aị Ebereham wuru sụ be kparu a nka.

Mkwana Chiokike

13 Mkwana Chiokike kweru Ebereham nū avnūrnū a nū be jeekehia ọwa búo hite n'ọbita Iwu, kọvu ome mma ke hiri n'ọkwnata. 14 Ọ búru nū ele zị nū mkpururu Iwu jeekehia mkwana wam, ọkwnata ovu bú nhne etekne, mkwana Chiokike kweru bnána iru. 15 Iwu neegweya ovu owe ẹhni Chiokike. Hne Iwu zila, ọ zá nye jaadna Iwu.

16 Mkwana wam hiri n'ọkwnata mkpọma. O mernu o hite n'oru gwuzoru kwem nū rime kpakara rumu Ebereham. Ọ búo ele zị n'Iwu kpọi, kọvu ma ele sno ọkwnata ovu Ebereham, kwnornu nū ọ bú nda kpakara aị. 17 Lele kpa be gbarū a n'ọkwukwo nsọ, “M mernu m jị nda agida mba.” Ọ bú nda aị n'anya Chiokike, nye ọ kwnatarū ovu, Chiokike ke naakpatne nye nwūrnū ọnwu, nye neeme nhne zigele a whuya iwhe.

18 Nga olile anya zila a, Ebereham kwnatarū ovu, ọ búru nda agida mba, lele kpa ọkwukwo nsọ kwuru, “Mkpuru i jaazi agida kpa.” 19 Ọkwnata ovu a dnáge adna, nga ọ whnūrnū nū anọ-ẹhni a bú nhne nwūrnū ọnwu, hne ọ bú otu riwhu awha, nū rẹkpa-nnwọ Sera nwūrnū ọnwu. 20 Kọvu ọkwnata ovu a dnáge adna hite nū ókwe ekwe mọbu onwe mkpọma lawuru gbasiri nhne Chiokike kweru a mkwana, ọkwnata ovu a mernu o gwuzosi rikne naaznarni Chiokike. 21 Ovu siri a rikne nū Chiokike nwernu rikne o mezu nhne o kweru mkwana. 22 Kam kpayarū, “Chiokike gwnusinu a nū ọ bú nye mee mma.” 23 Nū be gwnusiri a nū nye mee mma, búo nhne ke zinu a kpọi. 24 Ọ zị masinu aị ele be jọogwnusi n'ele mee mma, ele kweru nū nye wam mernu Jizosi Nyenwe aị hi n'ẹnwu lizọ. 25 Be nyernu a ma ọ nwụ kwnornu mmehie aị, o

hiri n'ẹnwu lizọ ma Chiokike gwnụsi aị lele ele ikpe mámana.

5

Snarnịma nụ udno

¹ Kịtna, hne Chiokike gwnụrnu aị lele ele ikpe mána hite n'ọkwnata ovu, a nwernu udno nụ Chiokike hite n'aka Nyenwe aị Jizọsi Karaịsi. ² Jizọsi bụ nye a hiri n'aka a, hite n'ọkwnata ovu gwuzoru n'oru Chiokike. A nọnwudna ọnwudna nụ a nwernu olile anya nụ a jeekehia igwugwu Chiokike. ³ Ọ bụo kam kpọi, a nọnwudna nụ rime awhnụwhnu, kwnornu nụ awhnụwhnu neegweya ọsnuta ovu, ⁴ ọsnuta ovu neegweya agwa ọma, agwa ọma gweya olile anya. ⁵ Olile anya aị jọbu nhne etekne, kwnornu nụ Chiokike wukwasiri aị ọwhnun'anya a n'ovu aị hite n'Enine Nsọ, ke o kesiri aị.

⁶ Kwnornu nụ nga a nwée rikne, Karaịsi nwurnu kwnornu aị ele ọjọ máa Chiokike. ⁷ Ọ bụ nhne siri rikne nụ badnụ jookwno nye ọma nwụ ẹnwu. Kọvu badnụ eleghi anya jeenwe rikne kwnornu nye mee mma nwụ. ⁸ Kọvu Chiokike gesiri aị ọwhnun'anya a ke bụ nụ Karaịsi kwnornu aị nwụma kpa a zị kọriri nụ rime mmehie.

⁹ Be hiri n'ọvnarna a gwnụ aị lele ele ikpe mána, ọ jọznohia aị n'ovu owe ẹhni Chiokike. ¹⁰ Kwnornu nụ a bụ ele irno Chiokike nụ mbom, kọvu aị nụ Chiokike mernu udno hite n'ẹnwu Nnwọ a. Kịtna, a bụ ele enyi Chiokike, ọ jọznohia a hite nụ bụdnụ Nnwọ a. ¹¹ Ọ bụo kam kpọi, kọvu a nọnwudna ọnwudna nụ rime Chiokike hite nụ Nyenwe aị Jizọsi Karaịsi, nye mernu aị nụ Chiokike ziri n'udno.

Adam nụ Karaịsi

¹² Lele kpa mmehie hiri n'aka otu badnụ bna nụ rime ọwa, mmehie vuyarụ ẹnwu, ẹnwu wam zuru kpakara ọwa, kwnornu nụ kpakara badnụ mehieru. ¹³ Mmehie zị n'ọwa sụ be nyernu Iwu, kọvu mmehie zila ire nga Iwu zila a. ¹⁴ Ẹnwu hiteru n'Adam dụ n'ige Mozizi nęechi kpakara badnụ, ma ele méhiele lele kpa Adam mehieru. Adam bụ nye bí'tala nhne Chiokike nyernu n'iwu.

Adam bụ oyiya nye wam jaava. ¹⁵ Kọvu nkesi wam nuna lele mmehie. Kwnornu ọ bụru nụ agida badnụ nwurnu hite nụ mmehie otu badnụ, oru nụ nkesi Chiokike zị agida kakwo, ke gazuru kpakara ele badnụ hite n'oru otu nye wam bụ Jizọsi Karaịsi. ¹⁶ Nkesi Chiokike zị ichne nụ hne mmehie otu badnụ zị. Ikpe snornu otu mmehie wam ke vuyarụ ọmuma ikpe, kọvu nkesi wam sno agida mmehie ke vuyarụ ọgwnusi badnụ lele nye ikpe mámana. ¹⁷ Mmehie otu badnụ ka, Adam, mernu ẹnwu nęechi ọwa, kọvu kpakara ele nahiaru nkesi oru zị agida ke Chiokike nụ ome mma a, jeemegbu mmehie nụ ẹnwu hite nụ otu badnụ wam ke bụ Jizọsi Karaịsi.

¹⁸ Owe! Otu mmehie Adam vuyarụ ọmuma ikpe nụ risi kpakara ele badnụ, kọvu, otu ẹrnu ome mma Karaịsi mernu ele badnụ bụru ele ikpe mámana n'anya Chiokike, ke nyernu be bụdnu. ¹⁹ Hite nụ risi rikne otu badnụ kpakara ele badnụ ghoru ele mmehie, otu aka wam masị, obno nsni otu badnụ jeeme kpakara ele badnụ bụru ele mee mma.

²⁰ Iwu varụ ma nhne ojo zị agida, kọvu hne mmehie zị agida, oru Chiokike barụ aba k'agida.

21 Hne mmehie n̄echi hite n'ɛnwu, oru Chiokike n̄echi hite n'ome mma ke noodubna n̄u b̄udnu kwó okwo hite n̄u Jiz̄osi Karāisi Nyenwe āi.

6

*Nwu n̄u mmehie,
z̄iri b̄udnu n̄u Karāisi*

¹ K̄ini b̄u nhne a jaakaa? Ọ b̄u ma a z̄i k̄oriri n̄u neeme mmehie ma oru Chiokike ba ọba? ² Óza r̄ia r̄ia! Ndaa kpa āi ele nw̄urnu ọnwu n̄u rime mmehie jaaz̄i k̄oriri b̄udnu n̄u rime a? ³ Ọ b̄u n̄u an̄u máa sa, be w̄uru āi mini ma āi n̄u Karāisi Jiz̄osi b̄uru otu, n̄u be w̄uru āi mini ma āi n̄u Karāisi b̄uru mas̄i otu n'ɛnwu a? ⁴ Hite n̄u mini be w̄uru āi, be lik̄otaru āi n̄u Karāisi n'ɛnwu a, ma a n̄u lele Karāisi nga o hiri n'ɛnwu liz̄o hite n'igwugwu ke Nda, a joowu b̄udnu ikne.

⁵ Kwnornu n̄u ọ b̄uru n̄u āi n̄u a b̄u otu n'ɛnwu a, kpam mas̄i, āi n̄u a j̄oburu otu n'oliz̄o n'ɛnwu a. ⁶ A magw̄u n̄u ẹhni ọknani āi b̄u ke be kpogidnernu ya n̄u Karāisi n'olu ọgba a, ma be lulu ẹhni mmehie, ma a gharu ọ b̄uru ọhi ke mmehie. ⁷ Kwnornu nga badn̄u nw̄urnu, mmehie nwéma iknernema n'ẹhni a berere. ⁸ Ọ b̄uru a snornu Karāisi nw̄u ɛnwu, a kweru n̄u a joosno a z̄iri b̄udnu. ⁹ A magw̄u n̄u Chiokike mernu Karāisi hi n'ɛnwu liz̄o, ọ j̄onwu kwno berere, ɛnwu nwéma iknernema hne ọ z̄i berere. ¹⁰ Ẹnwu ọ nw̄urnu, ọ nw̄urnu kwnornu mmehie otu mgba, ọ z̄i b̄udnu k̄itna, ọ z̄inu Chiokike b̄udnu.

¹¹ Kpam mas̄i, an̄u gwn̄u ẹhni an̄u lele ele nw̄urnu ọnwu kwnornu mmehie, k̄ovu ele z̄i b̄udnu nyee Chiokike hite n̄u Karāisi Jiz̄osi. ¹² An̄u kwé

mmehie n̄echi an̄o-ẹhni an̄u, neeme an̄u noobno nsni nhne ojo an̄o-ẹhni noopio. ¹³ An̄u kwéko o gweru ẹhni an̄u nyee mmehie ma o buru nhne ẹrnu ke risi rikne. Kọvu an̄u gweru ẹhni an̄u nyee Chiokike, lele ele hiri n'ẹnwu bna n̄u budnu, an̄u gweru kpakara ẹhni an̄u nyee ma be buru nhne ẹrnu ke nhne oma. ¹⁴ Kwnornu n̄u mmehie zá n̄echi an̄u, an̄u zila n̄u mkpururu Iwu, kọvu n̄u mkpururu oru ke Chiokike.

Ele ọhi ke ome mma

¹⁵ K̄ini bu ka? A jaazi neeme mmehie kwnornu n̄u a zá n̄u mkpururu Iwu, kọvu mkpururu oru ke Chiokike? Ọza r̄ia r̄ia. ¹⁶ An̄u magwu n̄u nye an̄u noobno nsni nhne o nookwu, an̄u bu ele ọhi nye an̄u noobno nsni. An̄u bu ọhi ke mmehie ke noodubna n'ẹnwu, m̄obu ọhi obno nsni ke noodubna n'ome mma. ¹⁷ Kọvu ọznarni z̄inu Chiokike, kwnornu n̄u mbom an̄u bu ọhi ke mmehie, kọvu an̄u b̄ornu nsni hite n̄u mkpoma an̄u bna n'ezi oka wam an̄u nah̄iaru. ¹⁸ Be d̄ohiaru an̄u n̄u mmehie an̄u, ma an̄u buru ọhi ke ome mma.

¹⁹ M nookwu lele badnu, kwnornu n̄u an̄u zá rikne. N̄u mbom, an̄u gweru ẹhni an̄u nyee nhne zila r̄ichna n̄u risi rikne o mee nhne ojo, kpam masi, an̄u gweru ẹhni an̄u buru ọhi ome mma bna n'ẹrnu zi nsọ. ²⁰ Nga an̄u bu ọhi ke mmehie, an̄u nwée igwe n'ome mma. ²¹ Ndaa mbnarna an̄u nweh̄iaru hite nhne kam n̄otu iwhnerne? Risi kpakara nhne kam, bu ẹnwu. ²² Kọvu k̄itna, be d̄ohiaru an̄u n̄u rime mmehie, an̄u buru ele ọhi ke Chiokike, mbnarna an̄u jeenweh̄ia jeeme an̄u z̄iri nsọ ke joodubna n̄u budnu kwó okwo. ²³ Kwnornu n̄u

ogwo ẹnu mmehie bu ẹnuwu, kọvu nkesi ke Chiokike bu budnu kwó okwo hite nu Karaịsi Jizọsi Nyenwe aị.

7

Nhne atụ ke ọlulu nzi nu nnwerné

¹ Rumu nda m, m nookwunu anụ ọka lele ele magwu Iwu, anụ magwu nu Iwu jigwu badnu hne nye wam zi budnu. ² Nyerinya nwernu nzi zi n'iwu nga nzi a zi budnu, kọvu ọ buru nzi a nwu, ọ zima iwu jigwu a lele nye zi nu nzi. ³ Ka neegesi, ọ buru nu nzi a zi budnu, nyerinya wam gbọ nzi berere, be jookwu a nye neeme ọyi. Kọvu ọ buru nu nzi a nwurnu ọnuwu, iwu jígele a, ọ buru nu ọ gbọru nzi berere. O méne ọyi.

⁴ Rumu nda m, otu aka wam, bu kpa ọ zinu anụ. Anụ nwurnu ọnuwu n'Iwu hite n'ehni Karaịsi. Anụ bu ke nye wam hiri n'ẹnuwu lizo, ma anụ buru mgwna ẹnu ke bnarnu iru n'aka Chiokike. ⁵ Nga a zi budnu n'anọ-ehni, nhne ojo ke Iwu Mozizi vuyaru bu nhne a noosno, kpakara nhne a mernu dubnarnu aị n'ẹnuwu. ⁶ Kọvu kịtna, a nwernunem ehni aị n'Iwu, kwnornu nu a agburulam n'iwu wam jigwu aị, a kpenu Chiokike n'apna ikne ke Enine, ọ buo n'apna ọknani ke Iwu be gbaru n'okwukwo.

Iwu nu mmehie

⁷ Kini bu nhne a jookwu? Iwu wam ọ bu mmehie sa? Ọza rịa rịa. Kọvu iwu mernu m mahia mmehie. M znégele m amahia nhne bu a ọwho-anya ọ buru n'Iwu kwúle, "I nwéko ọwho-anya." ⁸ Kọvu mmehie hite nu nhne be nyernu n'iwu nwehjaru oghere

ọ kpakne ọwho-anya zị ichne ichne. Kwnornu nụ mmehie nwururu ọnwu hne iwu zịla. ⁹ M zị m bụdnu hne iwu zịla, kọvu nga nhne be nyernu n'iwu varu, mmehie ziri bụdnu nụ rime m, m nwuma. ¹⁰ Nhne be nyernu n'iwu ke kwesiri o gweya bụdnu, vuyanu m ẹnwu.

¹¹ Mmehie hite nụ nhne be nyernu n'iwu duwhuru m, hite nhne be nyernu n'iwu, gbu m. ¹² Iwu wam zị nsọ, nhne be nyernu n'Iwu zị masị nsọ, ọ zị kwem, ọ bụru ọma. ¹³ Ka o neegesi nụ nhne bụru ọma vuyanu m ẹnwu? Ọza rịa rịa. Ọ bụ mmehie ke kpayaru a. Mmehie gweruru nhne bụru ọma mee a o vuyanu m ẹnwu, ma mmehie whuya iwhe nụ ọ bụ mmehie n'ezi. Hite nụ nhne be nyernu n'iwu be jeegesi nụ mmehie bụo ọma rịa rịa.

¹⁴ A magwu nụ Iwu bụ nhne enine. Kọvu m bụ m badnu etekne, nye be reru lele ọhi ke mmehie. ¹⁵ M máam nhne me neeme, kwnornu nụ nhne me noopio o mee, m nwée m rikne mee a, kọvu nhne me píole o mee, bụ nhne me neeme. ¹⁶ Nga me neeme nhne me píole o mee, ka neegesi nụ Iwu wam bụru ọma. ¹⁷ Kọvu ọ bụo me neeme nhne ka, kọvu ọ bụ mmehie ke wu nụ rime m. ¹⁸ M magwu m nụ ọ zá nhne ọma ọbula zị nụ rime m (ke bụ n'anọ-ẹhni m). Kwnornu nụ ọ naamasị m o mee nhne bụru ọma, kọvu m nwée m rikne o mee a. ¹⁹ M mee m nhne ọma me pioru o mee, kọvu nhne bụo ọma me píole o mee, bụ nhne me neeme. ²⁰ Ọ bụru nụ me mee nhne me píole o mee, ka neegesi nụ ọ bụo me bụ nye neeme a, kọvu ọ bụ mmehie wam ke wu nụ rime m.

21 M magwụ m nụ iwu nọornu ẹrnu, nga me pioru o mee nhne bụru ọma, nhne ọjọ zị nụ ruwhnu m. 22 Nụ rime enine m, m noopio iwu Chiokike. 23 Kọvu m nọowhnu iwu berere nọornu ẹrnu nụ rime m, iwu ke nọolusi iwu ke ovu ọgwu. O neeme m bụru ọhi iwu ke mmehie ke nọornu ẹrnu nụ anọ-ẹhni m. 24 M bụ m badnụ ke nọowhnuji anya. Nyele jọdohia m n'anọ-ẹhni ke ẹnwu ka? 25 A nọotunu Chiokike mmamma hite nụ Nyenwe aị Jizọsi Karaịsi.

Hite n'echiche m, m bụ m ọhi ke iwu ke Chiokike, kọvu, anọ-ẹhni m bụ ọhi iwu ke mmehie.

8

Budnu hite n'Enine

1 Kịtna, ọ zá ikpe naama ele zị nụ rime Karaịsi Jizọsi. * 2 Kwnornu nụ iwu ke Enine ke neegweya budnu nụ Karaịsi Jizọsi, mernu m whọga n'ọhi iwu ke mmehie nụ ẹnwu. 3 Nhne Iwu nwée rikne meli kwnornu nụ anọ-ẹhni badnụ zila rikne, Chiokike mernu a, o ziyaru Nnwọ a lele badnụ ke mmehie ma ọ bụru ariohna mmehie. Hite nụ ya ọ ma budnu mmehie ke badnụ ikpe. 4 Chiokike mernu ka ma nhne ziri ezi ke Iwu zu ozu nụ rime aị ele noowu budnu lele kpa Enine noopio, ọ bụo kpa anọ-ẹhni noopio. 5 Ele noowu budnu n'anọ-ẹhni neeme nhne anọ-ẹhni noopio, ele noowu budnu n'Enine neeme nhne Enine noopio. 6 Nye anọ-ẹhni nẹchi nwurnu ọnwu, kọvu nye Enine nẹchi

* **8:1** Agwna ọkwukwo ọknani kwuru: ele zá noowu budnu lele kpa mmehie pioru, kọvu lele kpa enine noopio.

nwernu bụdnu nụ udno. ⁷ Kwnornu nụ nye anọ-
 ẹhni nẹchi bụ nye irno Chiokike, o nwée rikne b́ta
 iwu Chiokike, n'ezi, o j́enwe rikne b́ta a. ⁸ Ele anọ-
 ẹhni nẹchi j́enwe rikne mee nhne j́oso Chiokike
 n'ọnu.

⁹ Anọ-ẹhni zá nẹchi anụ, kọvu Enine, ọ bụru nụ
 Enine Chiokike wu nụ rime anụ. Nye ọbula ke
 nwée Enine Karaịsi, b́o ke Karaịsi. ¹⁰ Ọ bụru nụ
 Karaịsi zị nụ rime anụ, ọ bụ n'ezi nụ anọ-ẹhni anụ
 nwurnu ọnwu kwnornu mmehie, kọvu enine anụ
 zị b́dnu kwnornu ome mma. ¹¹ Ọ bụru nụ Enine
 Chiokike ke mernu Jizọsi hi n'ẹnwu lizọ wuru nụ
 rime anụ, nye wam ke mernu Karaịsi hi n'ẹnwu lizọ
 jeeme anọ-ẹhni anụ ziri b́dnu hite n'Enine a ke wu
 nụ rime anụ.

¹² Kam kpayarụ, rụmu nda m, a jigwu ọgwo o wu
 b́dnu aị, ọ b́o kpa anọ-ẹhni noopio. ¹³ Kwnornu
 nụ ọ b́ru nụ anụ wu lele kpa anọ-ẹhni anụ noo-
 pio, anụ j́onwu ẹnwu, kọvu ọ b́ru nụ anụ jeehi
 n'enine gbu kpakara ẹrnu ojo ke anọ-ẹhni, anụ
 jaazị b́dnu. ¹⁴ Kpakara ele Enine Nsọ Chiokike
 nẹchi b́ rụmu Chiokike. ¹⁵ Kwnornu nụ Enine
 Chiokike nyernu anụ méne anụ ele ọhi, ke neeme
 anụ b́ru ele ogwnu. Kọvu Enine neeme anụ b́ru
 rụmu Chiokike, anụ jeenwe rikne kwnakwu a,
 “Papa, Nda m.” ¹⁶ Enine Nsọ Chiokike naagbanụ
 enine aị akebne nụ a b́ rụmu Chiokike. ¹⁷ Ọ b́ru
 nụ a b́ rụmu Chiokike, a b́ ele neekheja mkpe, ele
 neekheja mkpe Chiokike, ele be nụ Karaịsi neek-
 erikọta mkpe. Ọ b́ru a snornu a ta awnhụwhnu, a
 joosno a kehja igwugwu a masị.

Igwugwu ke zị nụ ruwhnu

18 M whnụrnu m nụ awnụwhnu ke ige ka bụ nhne a jéeji tịsinu igwugwu ke be jookpumenu aị. 19 Kpakara nhne be keru eke ji olile anya siri rikne neese nga be jeegesi rụmu Chiokike. 20 Kwnornu nụ nhne be keru eke ghọru nhne etekne, ọ bụo nụ rikne aka ke be, kọvu kpa Chiokike mernu be, be zị kọriri neele anya, 21 nụ nhne be keru eke jeenwernu ẹhni be whọga n'ẹhni oro oro, kehia igwe nụ o nwernu ẹhni zị igwugwu ke be bitannu rụmu Chiokike.

22 A magwụ dụ kịtna nụ kpakara nhne be keru eke nọosnu idne lele nye rime ọmumu nnwọ neeme. 23 Kọvu ọ bụo nhne be keru eke kpọi, ma aị masị ele nwernu Enine ke bụ nkesi mbọm ke Chiokike, a nọosnu idne nụ rime ovu aị, neese nga Chiokike jeeme a bụru rụmu a, ma ọ gbahia anọ-ẹhni aị. 24 Kwnornu be znọhiaru aị hite n'olile anya, kọvu ọ bụru a whnụ nhne a neele anya a, ọ buma olile anya n'ezi. Ọ zá nye neele anya nhne ke ọ whnụgwu anya. 25 Kọvu ọ bụru a neele anya nhne a zá nọowhnu anya, a jeeji nkasi ovu neese a.

26 Kpam masị, Enine Nsọ neeyinu aị aka, ọ bụ ezi nụ a zá rikne. Kwnornu nụ a máa kpa a jeekpe okpukpe, kọvu Enine Nsọ Chiokike neekpehianu aị, hite n'osnu idne ke ọnu jóokwuli. 27 Kwnornu nụ Chiokike nye noonyosna mkpọma badnụ magwụ echiche Enine, ọ bụ Enine Nsọ nọorio arịrio nụ risi ele nsọ lele kpa echiche Chiokike jiri zị.

A kakwo ele mmeri

28 A magwụ nụ Chiokike neeme kpakara nhne nọornuko ẹrnu ọma n'otu kwnornu ele whnụrnu Chiokike n'anya, ele o sukwuru ma

be mee echiche a. ²⁹ Kwnornu nụ ele Chiokike mahiamarnu, ọ bítaru be ichne, ma be nụ lele Nnwọ a, ma Nnwọ wam bụru Ọpnarna n'esilawuru agida rumu nda. ³⁰ Ele Chiokike bítaru ichne, o sukwuru be, ele o sukwuru, o mee be ele ikpe mámana, ele o mernu ikpe ele mámana, o mernu be kehja igwugwu a.

³¹ Ndaa nhne a jookwu nụ kpakara nhne ka? Ọ bụru nụ Chiokike dasi aị n'ikwnu, nyele jeemegidne aị? ³² Nye wam ke bítala Nnwọ a, kọvu kesi aị ya, ndaa kpa o jéenyé aị kpakara nhne? ³³ Nyele jooono ele Chiokike hohiaru nhne? Ọ bụ Chiokike bụ nye neeme ele badnụ ele ikpe mámana. ³⁴ Nyele bụ nye naama aị ikpe? Ọ bụo Karaisi Jizosi, nye nwurnu ẹnwu, nye hiri n'ẹnwu lizo, daziri n'akarikwnunga Chiokike nọorionu aị aririo. ³⁵ Nyele jeekewa aị n'owhnun'anya ke Karaisi? Ọ bụ mkpa, sọbu nhne osi rikne sa, sọbu okne okpagbu, sọbu oknunyọ, sọbu oğba-eto, sọbu aghom, sọbu ama-ogwnu? ³⁶ Lele kpa be gbarụ a n'okwukwo nsọ,

“Kwnornu anụ, ẹnwu neeché aị aka nụ ruwhnu
kpakara obochi,
be nọopnughari aị lele atnurnu be noogbu
ogbu.”

³⁷ Óza! A nwernu omeri nụ kpakara nhne ka hite nụ nye wam ke whnurnu aị n'anya. ³⁸ Kwnornu nụ m magwụ m nụ ẹnwu mọbu budnu, mọbu enine izi, mọbu ẹnwu ojo, mọbu nhne ke zị kịta, mọbu nhne ke jaava, mọbu rikne obula, ³⁹ mọbu olu mọbu nhne zị nụ rime eli, mọbu nhne berere be keru eke, jéenwe rikne kewama

aị n'òwhnun'anya ke Chiokike ke zị nụ rime Karaịsi Jizọsi.

9

Chiokike nụ ele ke

ọ ọhọhoruru

¹ M nookwu ezi ọka nụ rime Karaịsi, ọ bụo aghalaghala, Enine Nsọ naagbanụ ovu m akebne nụ m zà m naagha aghalaghala. ² Anya-mini zị m nụ mkpọma, nhne igbugbu zị m nụ mkpọma kpakara ige. ³ Ọ jaamasị m, ọ bụru nụ Chiokike vuru m ọnu, kewama m nụ hne Karaịsi zị, kwnornu rụmu nda m, ele ẹli m, ⁴ ele Izireli. Chiokike mernu be bụru rụmu a, o okpumennu be igwugwu a, ya nụ be gbarụ njo-ẹhni, o nyernu be Iwu, be nwernu okpukpe ọma, nụ kpakara mkwna Chiokike, ⁵ be bụ avnụrnu kwu ele nda ọknani, Karaịsi hiri n'avnụrnu be va n'anọ-ẹhni. Ọznarni zịnu Chiokike ke nẹchi kpakara nhne ọkwnukokwnu. Amịm. ⁶ Ọ bụo nụ Chiokike mézule ikwu-ọnu a, kwnornu nụ ọ bụo kpakara ele hi n'avnụrnu Izireli bụ rụmu Izireli n'ezi. ⁷ Kpakara be bụo rụmu Ebereham n'ezi, ọ bụbedi nụ be hi n'avnụrnu Ebereham. Kwnornu nụ ọkwukwo nsọ kwuru, “Kọvu be jọogwnu rụmu ị hite n'Aziki.” ⁸ Ka bụ nụ ọ bụo rụmu be mụrnu n'anọ-ẹhni bụ rụmu Chiokike, kọvu ele be mụrnu lele kpa Chiokike kwere Ebereham nụ mkwna bụ rụmu a n'ezi. ⁹ Kwnornu nụ ka bụ nhne mkwna wam kwuru, “N'ige be karụ aka, m jeehieha, Sera jọomu nnwọ rukna.”

¹⁰ Ọ bụo ka kpọi, rụmu Ribeka nwernu otu nda, ke bụ nda ọknani aị Aziki. ¹¹ Sụ ọ mụrnu rụmu ejima rukna lawụru wam, nga be mége nhne ọma

mọbu ke ojo, ma nhne Chiokike kwuru gwuzosi rikne, ¹² ọ búo hite n'ernu kọvu kwnornu nù o sukwu ikwu a, Chiokike kannu Ribeka, “Nye ke okno badnu jeeznenu nye ke matị izi.” ¹³ Lele kpa be gbaru a n'okwukwo nsọ, “M whnurnu m Jekọpu n'anya, sno Iso irno.”

¹⁴ Ndaa nhne a jookwu? Ọ bú nù Chiokike bú nye ndala sa? Ọza rịa rịa. ¹⁵ Kwnornu nù ọ kannu Mozizi,

“M jọdonu nye me jọdonu obirizi, obirizi,
mee masinu nye masiri m oru.”

¹⁶ Ka neegesi nù ọ búo hite nù nhne badnu noopio mọbu nhne be nọornu, kọvu ọ bú obirizi Chiokike. ¹⁷ Kwnornu nù okwukwo nsọ kannu Fero, “Ka bú nhne me kwno gwuzote i, ma m gesi m iknernema m n'ehni i, ma kpakara ọwa mahia rẹwhna m.” ¹⁸ Chiokike nọdonu nye masiri a obirizi, neemenu nye o pioru ma o knesni mkpọma, knesni mkpọma a.

Ikpe nù obirizi Chiokike

¹⁹ Otu badnu jaakanu m, “Ndaa kpa Chiokike naama aị ikpe? Nyele nwernu rikne o gwuzogidne echiche a?” ²⁰ Jị badnu etekne, i bú nyele naasa Chiokike ọka? Nhne be kpuru okpu ọ jaasikwa nye kpuru a ajji, “I kwno kịni kpụ m kpa?” ²¹ Ọ bú nye nọokpu ite o nwée rikne n'ehni otu ọrura wam kpụ ite lawuru, otu bna n'ernu zị okne mkpa, ke berere be ji a rnu ẹrnu kpakara ige?

²² Ọ zị Chiokike n'aka o gesi ikpe nù iknernema a, kọvu, ọ zị kwno a n'aka o gesi ogologo ọsnuta ovu n'ehni ele o neekpe ikpe, bú ele ọ bitaru ma ọ la be n'iyi. ²³ Ọ zị masi n'aka a ọ wukwasi

ọkwnamarna igwugwu a nụ bụdnu ele ọ bịtannu obirizi a. ²⁴ Kwnornu nụ a bụ ele o sukwuru, ọ bụo hite n'avnurnu ele Ju kpọi, kọvu ma hite n'eli ele bụo ele Ju. ²⁵ Ka bụ nhne o kwuru n'ọkwukwo Hosiya,

“M jookwu be ele ke m, ele wam bụo ele ke m,
ele wam me whnúge n'anya, m jookwu be ele
me whnurnu n'anya.

²⁶ Ọ jọobu nụ hne be zị kaa,
nụ be bụo ele ke m,
jọobu hne be jookwu be rụmu Chiokike ke zị
bụdnu.”

²⁷ “Azaya siri okokoba gbasiri rụmu Izireli, kaa,
Ọ bụ n'ezi nụ rụmu Izireli nụ lele rịzna ke ngeri
osimini,
ele be jọoznohia jaazị matị k'agịda.

²⁸ Kwnornu nụ Jihova jeekpebi ikpe ọwa wara
wara n'ome mma.”

²⁹ Lele kpa Azaya kwuru nụ mbom,
“Ọ buru nụ Chiokike ke Meli Nhne Dum
dónu aị obirizi ghasanụ aị agwna rụmu,
a znernu ọnu lele Sodom,
a znernu ọnu lele Gọmora.”

*Ele Izireli kwéle
ọ nabnarnu izi oma*

³⁰ Ndaa nhne a jookwu? Ọ bụ nụ ele bụo ele Ju
ele zá noosno ome mma Chiokike, nwehịaru ome
mma ke hi n'ọkwnata mkpoma? ³¹ Kọvu ele Izireli,
noosno iwu ome mma nwée nhne iwu ome mma
karu, be píońala a. ³² Kini kpayaru ka? Kwnornu
nụ be jíge ọtukwasi ovu pio a, kọvu lele nụ ọ bụ
n'ernu. Be dna n'olu rugwu nọokpobi ọchi. ³³ Lele
kpa be gbaru a n'ọkwukwo nsọ, kaa,

“Le, m bítaru m otu akaworugwu nù rime Zayòni
 ke jeeme ele badnú kpòbi òchi,
 rugwu ke jeeme be dna.
 Kòvu nye òbula ke túkwasiri a mkpòma,
 be jéekwe iwhnerne tù a.”

10

¹ Rùmu nda m, nhne nòogwnu m nù mkpòma, m neekpe masìnu Chiokike gbasìri ele ke m bù Izireli, bù ma be znòhia be. ² M jaagbanù be akebne nù be nwegwu mkpòma o kpenu Chiokike, kòvu be nwée òghohia. ³ Kwnornu nù be máa ome mma ke Chiokike, be bete noogwuzote ome mma ke be, be bítala èhni be nù mkpururu ome mma Chiokike. ⁴ Karaìsi bù mbimambi Iwu, nye òbula ke túkwasiri a mkpòma, jeenwehìa ome mma.

Oznohia zìnu kpakara badnú

⁵ Ka bù nhne Mozizi kwuru gbasìri ome mma ke hi n'Iwu, “Nye òbula ke bítaru Iwu jaazì budnu nù rime be.” ⁶ Kòvu ome mma ke hiri n'òtukwasi mkpòma karù kpa, “I kwúko nù mkpòma ì, ‘Nyele jeezne oligwe?’ (zne gwedna Karaìsi). ⁷ Mòbu, ‘Nyele jeezne nù rime èli?’ (zne gwelizo Karaìsi n'ènwu).” ⁸ Kòvu ndaa nhne o kwuru? “Ikwu-ònu wam zì ì ndundu, ò zì n'ònu ì ma n'ovu ì.” Kam bù ikwu-ònu òtukwasi ovu ke a nòokpo okwo. ⁹ Ò bùru nù ì jeeji ònu ì kwuhìa nù Jizòsi bù Nyenwe aì, gweru mkpòma ì kweru nù Chiokike mernu o hi n'ènwu lizo, be jòoznohia ì. ¹⁰ Kwnornu nù badnú jì ovu a kweru, be gwnùsi a nù nye ikpe mána, o jì ònu a kwuhìa, o nwehìa òznohia. ¹¹ Òkwukwo nsò

kwuru kpa, “Iwhnerne zá nọtụ ele kwnataru a ovu.” ¹² Ọ zá nhne zi ichne hne nye Ju nụ nye búo nye Ju zi. Chiokike bú Nyenwe kpakara badnụ, nọowukwasi ngozi a nụ risi ele naakwnakwu a. ¹³ Kwnornu nụ be jọoznohia kpakara ele noosukwu rẹwhna Nyenwe aị.

¹⁴ Kọvu ndaa kpa be joosukwu a, ọ búru nụ be kwéle nụ ya? Ndaa kpa be jeekweru, ọ búru nụ be nuna nhne gbasiri a sa? Mọbu ndaa kpa be jọonu, hne ọ zá nye nọokpo okwo izi oma? ¹⁵ Ndaa kpa be jọokpo okwo hne ọ zá nye zizneru be? Lele kpa be gbaru a n'okwukwo nsọ, kaa, “Le kpa ọchi be marnu mma bú ele neezni izi oma.” ¹⁶ Kọvu, ọ búo kpakara be kweru izi oma wam, kwnornu nụ Azaya karu, “Nyenwe aị, nyele kweru izi a ziri?” ¹⁷ Ka neegesi nụ okwnata mkpoma jeehi nụ onurnu izi oma va, onurnu jeehi n'okpo okwo izi oma Karaisi. ¹⁸ Kọvu m nesisikwa, ọ bú ezi nụ be nuna izi oma wam? Be nurnu a. Lele kpa okwukwo nsọ kwuru, “Nkọli be gazuru kpakara ọwa, ikwu-ọnu be duru hne ọwa sotoru.”

¹⁹ M nesisikwa kwno, ọ bú nụ ele Izireli máa? Mozizi n'iwuru a beru osno kaa, “M jeeji ele mba ọ zá nhne be bú mee anụ nwe anya-kwu, m jeeji mba ke nwée akoniche kpasu anụ iwe.”

²⁰ Azaya kwusiri a rikne kaa, “Ele zá noopio m, pioharu m, m mernu m ele zá nesisikwa ajiji gbasiri m whnu m anya.”

²¹ Ka bú nhne o kwuru gbasiri Izireli, “Kpakara obochi, m gbasaru m aka m lawuru o kwubnanya

ele risi rikne nù ele zá noobno nsni.”

11

Chiokike ghásala ele ke a

¹ M sika kwno, o bu nu Chiokike ghasaru ele ke a sa? Óza! Ma n'iwuru m bu nye Izireli, ke avuru Eberham, eriri ruwho Benjamini.

² Chiokike ghásala ele ke a o mahiamaru nu mbom. Anu magwu nhne okwuko nsu kwuru nu hne Elaija naariasno Chiokike megidne Izireli,

³ “Nyenwe ai, be gburu ele owhnurninya i, be kw-nadna ojo ariona i, me nu nsunu m gwnaru, be noopio o gbu m.” ⁴ Kini bu nhne Chiokike kannu a? “M bitanu m eni m pokwu ele rukna esau, ele kpónna Bali risi eli.” ⁵ Kpam masi, n'ige ka, Chiokike, hite n'oru a hohiaru ele ke gwnaru.

⁶ Kwnornu nu o bu oru a, o buo n'enu, o buru nu o bu hite n'enu, oru bu ma oru.

⁷ Kini kwno? Ele Izireli piohala nhne be noopio, kovu ele wam o hohiaru piohara a, ovu kporu ele berere bekwnu. ⁸ Lele kpa be gbaru n'okwuko nsu, kaa,

“Chiokike nyernu be enine iwhnirniwhno
be nwernu anya, kovu be whnu osno,
be nwernu nsni, kovu be nu nhne,
du tna.”

⁹ Devidi karu,
“Iriri be gho mbita nu nhne joogbu be,
be dna n'olu a, ta awnuruwhnu.

¹⁰ Isni kpu be, be whnu osno,
ivu rinya nyigbu be okwnukokwnu.”

Oznohia ele buo ele Ju

¹¹ M n̄esikwa, ele Izireli be dnarnu ma be la n'iyi sa? Oza r̄ia r̄ia. Kwnornu nu mmehie be, ele buo ele Ju nwehiaru oznohia, ke jeeme ele Izireli nwe anya-kwu. ¹² O buru nu mmehie be mernu kpakara owa nwe ngozi, be dnarnu mboni ma ele buo ele Ju nwehia ngozi, kpakara owa jeenwe agida ngozi nga be jeekweru nu Karaɔsi.

¹³ M nookwunu anu oka kitna ele buo ele Ju. Hne me bu nye izi ele buo ele Ju, m jeeji ɛnu m kpa nganga. ¹⁴ Nyele ma, m nwernu rikne mee ele eli m nwe anya-kwu, ma m nwernu m rikne znohia agwna be. ¹⁵ Kwnornu nu nga Chiokike ghasaru be, kpakara owa nu Chiokike mernu udno. Kini jeeme nga Chiokike jookwubnanya be? O jobu nu ele nwurnu onwu jaazi budnu. ¹⁶ O buru nu mpekele bredi mbom be nyernu Chiokike zi nsɔ, kpakara ke gwnarnu zi nsɔ. O buru nu egwnugwnu isisi zi nsɔ, kpakara nkala a zi masi nsɔ. ¹⁷ O buru nu be o gbukwahalaru agwna nkala olivu, be gweru anu bu nkala olivu ohia nyakwnusi a, anu neeri nhne oma ke hi n'isisi olivu wam. ¹⁸ Anu menu nkala wam oknomokno, chenwanya nu o buo anu vu egwnugwnu, kovu egwnugwnu vugwu anu. ¹⁹ Kovu kwu kpa, "Be gbukwahalaru nkala isisi gweru ai nyakwnusi." ²⁰ Owe! Be gbukwahalaru be kwnornu nu be kwé ekwe, kovu, anu gwuzo kwnornu nu anu tukwasiri ovu. Anu v̄ulizo ehni anu olu, tn̄numa, anu tu ogwnu. ²¹ Kwnornu nu o buru nu Chiokike gharula o ta nkala isisi olivu ke ruh̄iaru awhnuwhnu, o jaagharu o ta anu awhnuwhnu.

²² Le mkpoma oma nu nhne rikne ke Chiokike, nu

o mesiri ele dnarnu adna rikne, kovu o donu anu obirizi, o buru nu anu jaadazigidne nu mkpoma oma a. O buru nu anu jaadazigidne nu mkpoma a, o joogbukwahala anu. ²³ O buru nu ele Ju jeehi n'ókwe ekwe be whuya, Chiokike jaanyakwnusi be berere, kwnornu nu Chiokike nwernu rikne o nyakwnusi be. ²⁴ Anu bu nkala isisi olivu ohia, ke Chiokike nyakwnusiri n'ehni isisi olivu be znurnu oznu, lele kpa o kwésile. O buru nu Chiokike mernu kpa, anu mahia nu o nwernu rikne nyakwnuhnasi nkala isisi olivu be znurnu oznu n'ehni isisi olivu kam be zi.

*Obirizi Chiokike
zinu kpakara badnu*

²⁵ Rumu nda m, o nwernu nhne omimi me noopio anu mahia, ma anu gharu eche nu anu bu ele akọ n'anya anu. Nhne omimi kam bu nu risi rikne rumu Izireli jaazi okwnukokwnu. Kovu o jaazi tem onu ogwnugwnu ele buo ele Ju ele jaavakwnusi Chiokike zute. ²⁶ Kpam masi, be jooznohia kpakara ele Izireli, lele kpa be gbaru a n'okwukwo nsọ, “Nye Oznohia jeehi nu Zayoni va,
o joovume kpakara mmehie rumu Jekopu.

²⁷ Me nu be jaagba njọ-ehni,
nga me vumernu mmehie be.”

²⁸ Ele Ju bu ele irno izi oma. Ka bu mbnarna ke anu ele buo ele Ju. Kovu be bu ele o hohiaru, whnu be n'anya kwnornu ele nda be oknani. ²⁹ Chiokike za naagbanwo echiche a n'ehni ele o hohiaru, gozi masi. ³⁰ Hne anu ele buo ele Ju zi, anu bnoge Chiokike nsni nu mbom, kovu kitna, anu nwernu obirizi Chiokike kwnornu ele Ju ele bnoge

nsnị. ³¹ Kpam masị, anụ nwehịaru obirizi Chiokike mernu ele Ju bnóge Chiokike nsnị ma be nwehịa masị obirizi Chiokike. ³² Kwnornu nụ Chiokike mernu kpakara ele badnụ bụru ele risi rikne ma be nwehịa obirizi a.

Ọznarni zịnu Chiokike

³³ A! Le kpa ẹkwnu nụ akọniche nụ nhne ọmuma Chiokike hna omimi.

Kpa a nwée rikne nyosna a echiche a,
badnụ nwée rikne piohiali apna a.

³⁴ “Nyele magwụ mkpọma Nyenwe aị?
Nyele nwernu rikne zni a ezni?”

³⁵ “Nyele nyeleru Chiokike nhne,
ma Chiokike kwụ a ọgwo?”

³⁶ Ya keru kpakara nhne, kpakara nhne ke zị bụ ke a, ya nwe kpakara nhne.

Ọznarni zịnu a ọkwonukokwnu. Amim.

12

Budnu nye ẹnu Chiokike

¹ Rụmu nda m, kam kpayarụ, m ji m obirizi Chiokike naariaso anụ, anụ gweru ẹhni anụ yisi n'aka Chiokike lele arịohna zị budnu, zị nsọ, ke nọoso Chiokike n'ọnu, bụ ke anụ kwannụ Chiokike n'ezị. ² Anụ nụko lele ele ọwa ka, kọvu Chiokike gbanwo echiche anụ ma ọ ziri ikne ikne, ma anụ mahia nhne bụ echiche Chiokike, echiche ọma a, ke nọoso a n'ọnu, ke zuru ozu. ³ Kwnornu nụ oru Chiokike nyernu m, me kanụ anụ, ọ zá nye vulizọ ẹhni a olu n'oriri a karụ kpa o kwesiri, kọvu anya dno anụ nụ risi n'okpe ẹhni anụ ikpe. Anụ gweru ọkwonata ovu Chiokike tịsinnu anụ kpe ẹhni anụ

ikpe. ⁴ Lele kpa a nwernu agida nhne ke zị ẹhni, ke ọbula nwernu ẹrnu ke a. ⁵ Kpam masị, ọ bụ n'ezị nụ a zị agida, a bụ otu nụ rime Karaịsi, be knekotaru aị n'otu lele nhne zị ọdo nụ ọdo n'otu anọ-ẹhni. ⁶ Nye ọbula nwernu nkesi ke a lele kpa oru Chiokike nyernu a. Ọ bụrụ nụ nkesi otu badnụ bụ whnụ ọwhnurninya, nye wam gweru ọtukwasi ovu mee a. ⁷ Ọ bụrụ nụ nkesi a bụ o zne izi, o zne a, ọ bụrụ o zni nhne, o zni nhne. ⁸ Ọ bụrụ ọ gba ele badnụ inwe, o mee kpam. Nye neekesi ele berere nhne, o mee a nụ mkpọma ọma, nye noodu ele badnụ, ọ rnụsi ẹrnu a rikne. Nye nọodo obirizi, o gweru mkpọma ọma mee a.

Iznizni gbasịru

Ọwhnun'anya

⁹ Ọwhnun'anya kwesiri ọ zị snam. Anụ sno nhne ọjo irno, anụ knekwaru nhne ọma aka rikne. ¹⁰ Anụ gweru ọwhnun'anya rụmu nda whnụ ibne anụ n'anya nụ rime Karaịsi, anụ sọbisinu ibne anụ karu ẹhni anụ. ¹¹ Anụ búo ele ime mgwụ, anụ rnụsi ẹrnu rikne, anụ gweru mkpọma zị snam neeznenu Nyenwe aị izi. ¹² Anụ nwụdna n'olile anya, anụ snụta mkpọma nụ rime ọkpagbu, neekpe okpukpe kpakara ige. ¹³ Anụ nụ ele nwée nhne kerita ẹkwnu anụ, anụ lekọta ele izne.

¹⁴ Anụ nọogozi ele naakpagbu anụ, anụ nọogozi, anụ vúko be ọnu. ¹⁵ Anụ snornu ele nọonwudna ọnwudna, nwụdnahoru, anụ snornu ele naagba mkpe, gba mkpe. ¹⁶ Nhne gbasịri ele berere metụ anụ nụ mkpọma. Anụ búko ele oknomokno, anụ snornu ele ovu dūru ẹli mekọ nhne. Anụ búo ele akọ n'anya anụ.

17 Anụ jíkọ nhne ojo kwụ nye mernu anụ nhne ojo ogwo. Anụ mee nhne bụru ọma n'anya ele badnụ. 18 Anụ nụ kpakara ele badnụ ziri n'udno, ọ bụru nụ o kwe omume, kpa anụ nwernu rikne. 19 Ele me whnurnu n'anya, anụ mégwarnụ, kọvu gharu ọnuma Chiokike rnụ ọrnụ a, kwnornu nụ ọkwukwo nsọ kwuru, nụ Nyenwe aị kwuru, “Mawa nwe mmegwnahia, m jeemegwnarnụ.”

20 Kọvu lele nhne ọkwukwo nsọ kwuru,
 “Ọ bụru nụ wiri nọogwnu nye irno i, nyee a wiri,
 ọ bụru nụ akpịri nọokpo a bẹkwnu, kwute a
 mini, o nwọrnụ,
 kpam, i naaghakwasị esekere bẹkwnu n'olu risi a.”
 21 Anụ kwé nhne ojo megbu anụ, kọvu anụ gweru
 nhne ọma megbu nhne ojo.

13

Mkpururu ele ọchichi

1 Nye ọbula b́ta ẹhni a nụ mkpururu ọchichi, kwnornu nụ ọ zá ele nẹchi ọchichi ke Chiokike b́tala, Chiokike b́taru kpakara ele nẹchi ọchichi. 2 Nye ọbula ke neemegidne ọchichi neemegidne nhne Chiokike b́taru, nye mernu kpam jeegweyanụ ẹhni a ikpe. 3 Ele neeme nhne ọma zá nọotu ogwnu ele ọchichi, kọvu ele neeme nhne ojo jọotu ogwnu. I pioru ogwnu ele nẹchi ẹchi gharu ọ tụ i? Mee nhne bụru ọma, be jaaznarni i. 4 Kwnornu nụ ọ bụ nnwọ izi Chiokike neeme nhne ọma. Kọvu ọ bụru nụ i mee nhne ojo, ogwnu a tụ i, kwnornu nụ o v́le ama-ogwnu a etekne. Ọ bụ nnwọ izi Chiokike, neemegwnahianu a oву owe ẹhni a n'ẹhni ele neeme nhne ojo. 5 Kam kpayaru,

i jobno nsnị ele ọchichi, ọ bụo kwnornu nụ ovu owe ẹhni Chiokike kpọi, kọvu kwnornu nụ mkpọma i. ⁶ Ke bụ anụ jootu ntụ-ẹli, kwnornu nụ ele ọchichi bụ rụmu izi Chiokike nọornu ẹnu zịnu be, ele ji kpakara ige be nẹechi ọchichi. ⁷ Anụ kwụ ọgwo anụ ji be, tū ntụ-ẹli ọ bụru anụ ji ọgwo ntụ-ẹli, tū ntụ ahia ọ bụru nū anụ ji ọgwo ntụ ahia, sọ nye kwesiri anya, bisinu nye kwesiri.

Whnụ ibne anụ n'anya

⁸ Anụ jí nye ọbula ọgwo, kọvu anụ whnụrita ẹhni anụ n'anya. Nye ọbula ke nọowhnu badnụ ibne a n'anya mezuru Iwu. ⁹ Iwu wam, “I mékọ ọyi, i gbúko badnụ, i znúkọ buznu, i nwéko ọwho-anya.” Ka nū kpakara iwu berere jikọgwu aka n'otu iwu ka, “Whnụ nye agbatibi i n'anya lele ẹhni i.” ¹⁰ Nye ọbula ke whnụrnu nye agbatibi a n'anya jéeme a nhne ojo. Ọwhnun'anya bụ o mezu kpakara Iwu.

¹¹ Anụ mee kpa, anụ magwụ nhne ige ka bụ. Ka bụ ige anụ jeetnanya n'anyarna, kwnornu nū ọznohia aị zị ndundu kịtna karụ nga a kweru nū mbom. ¹² Chi jiminem, chi ọbubo zị masị ndundu, a gharụ ẹnu ọchichiri, woru mgwna ọgwnu ke iwhne. ¹³ Ngwa ma a kpa agwa lele ele zị n'iwhne ke ọbochi, ọ bụo ele okne iriri nū ele ẹra manya naagba, ọ bụo nū nhne rune nū nhne tū iwhnerne, ọ bụo ọlu ọgwnu, nū anya-kwu. ¹⁴ Kọvu anụ woru Nyenwe aị Jizọsi Karaịsi lele iwo, anụ nyée anọ-ẹhni anụ oghere o mee nhne ojo ke nọogwnu a.

14

Anụ kpé rụmu nda anụ ikpe

¹ Anụ kwubnanya nye zá rikne nụ ọkwnata ovu, kọvu anụ nụ a dọgbuta kwnornu nhne o kweru. ² Ọkwnata ovu otu badnụ kweru a, o ri kpakara nhne, kọvu nye berere, ọkwnata ovu a zá rikne, neeri ọkwukwo ọhia kpọi. ³ Nye ke neeri kpakara nhne lédna nye zá neeri anya, nye zá neeri kpakara nhne kpé nye neeri kpakara nhne ikpe kwnornu nụ Chiokike nakweruru a. ⁴ I bụ nyele ke neekpe ọhi nye berere ikpe? Ọ bụ nyenwe a jaakaa ma ọ mekwahịaru mọbu o mékwahịala. O jeemekwahịa, kwnornu nụ Nyenwe aị jeeme a o gwuzoru kwem.

⁵ Otu badnụ kanụ otu ọbochi zị mkpa k'agida n'esilawuru ọbochi berere, nye berere jaakaa nụ kpakara ọbochi bụ otu. Echiche nye ọbula ji a ruwho. ⁶ Nye karụ nụ otu ọbochi zị mkpa k'agida neeme a nọsobisinu Nyenwe aị, nye neeri nhne ọbula nọsobisinu Nyenwe aị, kwnornu nụ ọ nọotunu Chiokike mmamma nụ wiri wam. Nye zá neeri agwna nhne nọsobisinu Nyenwe aị, nọotunu Chiokike mmamma. ⁷ Ọ zá nye zịnu ẹhni a bụdnu kpọi, ọ zá nye nọonwunu ẹhni a ẹnwu. ⁸ Ọ bụru nụ a zị bụdnu, a zịnu Nyenwe aị bụdnu, a nwuru ẹnwu, a nwuru Nyenwe aị, ma a zị bụdnu ma a nwuru ọnwu, a bụ ke Nyenwe aị.

⁹ Kwnornu nụ Karaịsi nwuru, hi n'ẹnwu lizọ ma ọ bụru Nyenwe ele zị bụdnu nụ ele nwuru ọnwu.

¹⁰ Jịwa, i kwno kịni neekpe nnwọ nda i ikpe? I kwno kịni neeledna nnwọ nda i anya? Kpakara aị joogwuzo nụ ruwhnu ngadna ikpe Chiokike.

¹¹ Lele kpa be gbarụ a n'ọkwukwo nsọ,

“Nyenwe aị kwuru kpa, ‘Kpa me zị bụdnu
kpakara mpnerne ọchi joogbunu m n'ẹli,

kpakara riro jookwupiya nū mawa bụ Chiokike.’ ”

¹² Kpakara aị n'otu n'otu jaakahia nhne a mernu nū ruwhnu Chiokike.

¹³ A gharu o kpe ẹhni aị ikpe, tñunuma, ị bíta nhne jọkpo nnwọ nda ị ọchi, mọbu nhne jeeme ọ dna. ¹⁴ M magwu m nū hite nū mmekorita ke me nū Nyenwe aị Jizosi, ọ zá nhne ke zila richna, ọ buru nū badnu kaa nū otu wiri zila richna, ọ zila richna hne ọ zi. ¹⁵ Ọ buru nū nhne i riri jeemekasi nnwọ nda ị ẹhni, ị zá neezne izne n'ọwhnun'anya. I kwéko nhne i riri lulu nye Karaịsi kwnornu nwu ẹnwu. ¹⁶ I kwéko be kaa nū nhne ọma ị bụ nhne ojo. ¹⁷ Kwnornu nū ẹli-eze Chiokike búo nhne oriri nū ọnwunwo, kọvu ọ bụ ome mma, udno nū snarịma nū rime Enine Nso. ¹⁸ Kwnornu nū nye neeznenu Karaịsi izi kpa neeme nhne nọso Chiokike n'ọnu ma nū ruwhnu ele badnu. ¹⁹ Ngwa ma a neeme nhne jeegweya udno, nū ke joowuli aị olu lele ọro. ²⁰ I kwnó wiri lulu ẹnu aka Chiokike. Kpakara wiri zi richna, kọvu ọ búo ọma o ri nhne jeeme badnu dna. ²¹ Ọ buru ọma ị gharu o ri wiri, mọbu nwọ manya, mọbu mee nhne ọbula ke jeeme nnwọ nda ị dna.

²² Kpakara nhne i kweru nū rime nhne ele ka, dazinum ji nū Chiokike. Nye ikpe máge nū nhne o kweru bụ nye ọwa ọma. ²³ Kọvu ọ buru nū mkpọma badnu marnu a ikpe nū nhne o riri, Chiokike jaama a ikpe ma o ri a, kwnornu nū ọ kwnátala mkpọma nū nhne o neeme. Nhne ọbula ke híge n'ọkwnata mkpọma bụ mmehie.

15

Mee nhne jọoso ele berere

n'ọnu

¹ Aị ele zị rikne nụ ọkwnata mkpọma kwesiri o vuru ekperi ele zá rikne. Ọ búo neeme nhne nọoso aị n'ọnu. ² Nye ọbula menu badnụ ibne a nhne bụru ọma, ke jọoso a n'ọnu, ma o wulizọ a olu lele ọro. ³ Kwnornu nụ Karaịsi méne nhne jọoso ẹhni a n'ọnu, lele kpa be gbarụ a n'ọkwukwo nsọ, “Nhne iwhnerne ele naakpasị ị iwhnerne dnakwasịri m.”

⁴ Kpakara nhne be gbarụ n'ọkwukwo nsọ n'ọbochi wheru ewhe zịnu aị, neezni aị nhne, ma a nwernu olile anya hite n'ndidi nụ ọgba inwe ke ọkwukwo nsọ nyernu aị.

⁵ Chiokike ke neenye ndidi nụ ọgba inwe mee anụ nwernu enine ọziri n'otu kpa anụ noosno Karaịsi Jizọsi, ⁶ ma kpakara anụ n'otu jeegweru otu ọnu znarnị Chiokike nụ Nda Nyenwe aị Jizọsi Karaịsi.

⁷ Anụ kwubnanya ibne anụ lele kpa Karaịsi kwubnanyarnụ anụ ma anụ znarnị Chiokike. ⁸ M naakanụ nụ Karaịsi ghọru nnwọ izi ele Ju ma o gesi ezi ọka Chiokike, mezu mkwna o kweru nda be ọknani, ⁹ ma ele búo ele Ju nyee Chiokike igwugwu kwnornu obirizi a, lele kpa be gbarụ a n'ọkwukwo nsọ,

“Ka bụ nhne me kwno znarnị ị n'esilawuru ele búo
ele Ju,

m jọogwnunu rẹwhna ị eri.”

¹⁰ Ọ kaa, berere,

“Anụ snornu rụmu Chiokike nwụdna, anụ ele búo
ele Ju.”

¹¹ Ọ kaa, berere,

“Anụ ja Nyenwe aị, kpakara ele bụo ele Ju,
 kpakara ele badnụ gwnụnu a eri ọznarni.”

12 Berere kwno, Azaya karụ,

“Otu Badnụ jeehi n'ẹbnurnu Jesi va,

o jeelizọ chị kpakara mbam,

ele bụo ele Ju jeelekwasị a anya.”

13 Kịtna, Chiokike ke olile anya gweru ovu ọso nụ udno mejite ọkwnata mkpọma anụ nụ rime a, ma olile anya anụ nooso oso hite nụ rikne Enine Nsọ.

Pọlu nye izi ele bụo ele Ju

14 Rụmu nda m, m magwụ m nụ nhne ọma zị nụ mkpọma anụ. Anụ magwụ kpakara nhne ka nkari nkari, ke jeeme anụ nwernu rikne neeznitaru ẹhni anụ nhne. 15 M ji m anya siri rikne gbanụ anụ ọkwukwo, ma anụ chenwanya agwna nhne, kwnornu nụ oru Chiokike nyernu m. 16 Chiokike mernu m nye izi Karaịsi Jizọsi, nye nọornunu ele bụo ele Ju ẹrnu, nye naakwa ariọhna, nọokpo okwo izi ọma Chiokike, ma ele bụo ele Ju bụru nhne ariọhna Chiokike jeegweru, ke Enine Nsọ bịtaru nsọ.

17 Kam kpayarụ, m ji m ẹrnu m naanya risi nụ rime Karaịsi Jizọsi nhne gbasiri Chiokike. 18 M jọokwu nhne berere karụ nhne Karaịsi mernu hite n'aka m, o duru ele bụo ele Ju be bụru ele noobnonu Chiokike nsnị hite n'ikwu-ọnu m nụ ẹrnu m. 19 Hite nụ rikne nhne ọgba akebne nụ ẹrnu ndu-ẹhni ke Enine Chiokike hite nụ Jeruselem du Ilirikom, m nọokpo okwo izi ọma gbasiri Karaịsi n'apna zuru ozu.

20 Ọ bụ nhne zị nụ mkpọma m o zni izi ọma hne be nuna nhne gbasiri Karaịsi, ma m gharụ m o wu ọro

n'olu ntụ-ẹli ọro nye berere. ²¹ Lele kpa be gbarụ a n'okwukwo nsọ,

“Ele be kánnụ be nhne gbasịri a jọowhnurnu, ele nuna nhne gbasịri a jọoghohia.”

²² Kam kpayarụ, be kwéle me vakwnusi anụ.

*Pọlu marnụ mmụma
o zne Rom*

²³ Kọvu kịtna, ọ zá nhne me jọornu nụ kpakara ẹli ka, ọ nọogwnu m ọ whnụ anụ anya agịda awha ka. ²⁴ M jeeme kpam kịtna, m jọowhnu anụ kpa me neezne Sipeni. Anụ jeeyinu m aka n'izne m, ma me nụ anụ dazikwole ige matị. ²⁵ Kọvu kịtna, m neezne Jeruselem kwnornu ele ke Chiokike zị pji. ²⁶ Kwnornu nụ ọ masịri ọgbako Chiokike ke zị nụ Masidonia nụ Akaya o gweya nhne be jeekesi ele mboni zị n'esilawuru rụmu Chiokike ke zị nụ Jeruselem. ²⁷ Ọ masịri be o yinu be aka, kọvu ezi ọka zị a bụ ka, ọ bụ ẹrnu zịnu be o yinu ele mboni wam aka, kwnornu nụ ele Ju nụ ele búo ele Ju neekerita ngọzi ke enine, ele búo ele Ju kwesiri o kesi ele Ju ngọzi ke ẹkwnu be. ²⁸ Nga me rnụkparu ẹrnu ka, nyega be nhne be tuiharu, m jọowhnu anụ nga me neezne Sipeni. ²⁹ M magwụ m nụ nga me jaava, m jeeji agịda ngọzi Karaịsi va.

³⁰ M naarijasno anụ, rụmu nda m, hite nụ Nyenwe aị Jizọsi Karaịsi nụ ọwhnun'anya ke Enine Nso, anụ snornu m kpesi okpukpe rikne nụ ruwhnu Chiokike kwnornu nhne me nọowhnu. ³¹ Anụ kpe okpukpe ma be dọhia m n'aka ele kwé ekwe zị nụ Judiya, ma ele Chiokike zị nụ Jeruselem nabnarnụ ẹrnu m n'esilawuru be, ³² ma hite n'echiche Chiokike, m jeeji snarnịma vakwnusi anụ, ma me

nụ anụ dazirikota nụ mkpoma oma. ³³ Chiokike ke udno dazinu kpakara anụ. Amim.

16

Obekwu ikwu Pọlu

¹ M neegesi anụ nwene aị rinya Febi, ke nọornunu ogbako Chiokike ke zị nụ Kęnkiria ęnu. ² Anụ bikno nabnanya a nụ rẹwhna Nyenwe aị lele kpa rumu Chiokike kwesiri, anụ yisinu a aka nụ nhne obula zị mkpa, kwnornu nụ o bu nye ovu oma neeyinu agida ele berere aka ma me masi.

³ Anụ bekwu Prisila nụ Akwila, ele ęnu ibne m, ele me nụ be sno nọornunu Karaịsi Jizosi ęnu. ⁴ Be gweru budnu be bita nụ nhne oze budnu nụ risi m, m nọtnu be mmamma, o buo me nụ nsnunu m kpoi, kovu kpakara ogbako Chiokike zị n'eli ele buo ele Ju nọtnu masinu be mmamma. ⁵ Anụ bekwu ogbako Chiokike zị n'oro be. Anụ bekwu enyi m me whnurnu n'anya Epenetusi, nye mbom ke hi n'Esia kweru nụ Karaịsi.

⁶ Anụ bekwu Meri nye rnunu anụ agida ęnu.

⁷ Anụ bekwu Andronikusi nụ Junias, ele Ju ibne m me nụ be zị n'ikelu, be bu ele badnu marnu nkari nkari n'esilawuru ele izi, be beru m osno mahia Karaịsi.

⁸ Anụ bekwu Ampilatusi, nye me whnurnu n'anya nụ rime Nyenwe aị. ⁹ Anụ bekwu Uribanusi nye ęnu ibne aị n'ęnu Karaịsi, nụ Sitakisi enyi oma m.

¹⁰ Anụ bekwu Apelesi nye be kparu iru, o whe nụ Karaịsi.

Anụ bekwu ezi-nu-oro Arisitobulosi.

11 Anụ bekwu Erodioni nye Ju ibne m. Anụ bekwu ele ezi-nụ-oro Nakiso, ele zi nụ rime Nyenwe aị.

12 Anụ bekwu Terifena nụ Terifosa ele ernalu nụ rime Nyenwe aị, nụ nye me whuru n'anya bu Pesisinye ernalu nụ rime Nyenwe aị.

13 Anụ bekwu Rufosi, nye ernalu Nyenwe aị hohiaru. Anụ bekwu nne a, nye bu masi nne m.

14 Anụ bekwu Asikiritosi, Filegoni, Hemisi, Patirobasi, Hemasi nụ kpakara rumu nda anụ nụ be zi.

15 Anụ bekwu Filologosi nụ Julia, nụ Nerusi nụ nwene a rinya, nụ Olimpasi nụ kpakara rumu Chiokike be nụ be zi. 16 Anụ gweru obekwu ikwu nsọ ke rumu nda bekwurita eni anụ. Kpakara ogbako Chiokike nebekwu anụ.

Ezni ipne-aznu Pọlu

17 Rumu nda m, anụ bikno, anya du anụ eli gbasiri ele neegweya okewa nụ naakpahie okwnata oву ele badnu anya, ele neezni nhne ke neemegidne iznizni anụ nahiaru. Anụ neeze be.

18 Kwnornu nụ ele nụ kpam za norunu Karaisi ernalu, kovu ruwho be. Hite n'onu biri biri be nụ oka so n'onu, be nooduwu ele zi snam nụ mkpoma.

19 Kpakara ohna uru obno nsi anụ, ke mernu mkpoma so m n'onu k'agida kwnornu anụ. Kovu m pioru m anụ buru ele nwernu akoniche hne nhne oma zi, ele ikpe mana hne nhne oju zi.

20 N'ige mati Chiokike ke udno jozogbu Ek-wensu nụ mkpururu ochi anụ. Oru ke Nyenwe aị Jizosi dazinu anụ.

²¹ Timoti nye ẹnu ibne m neebekwu anụ, ya nụ Lusọsi, nụ Jasoni nụ Sọsipata ele Ju ibne m.

²² Mawa, Tetiọsi, nye gbarụ ọkwukwo ka neebekwu anụ nụ rime Nyenwe aị.

²³ Gayọsi nye me zị n'ọro a, nye ọgbako Chiokike zị n'ọro a, neebekwu anụ. Ọchi-ịwai ọhna bụ Erasitosi nụ nwene aị rukna Kwatusi neebekwu anụ. [²⁴ Oru ke Nyenwe aị Jizọsi Karaịsi dazinu kpakara anụ. Amịm.]

²⁵ Ọznarni zinu Chiokike nye nwernu rikne mee anụ gwuzoru lele kpa izi ọma me neezni kwuru, nụ ọkpo okwo Jizọsi Karaịsi, lele kpa okpume nhne gwnarnụ agwna ke zị omimi ogologo ige wheru ewhe. ²⁶ Kọvu be kpumernu a hite nụ nhne ele ọwhnurninya gbarụ n'ọkwukwo hite n'iwu Chiokike zị ọkwukokwunu. O mernu kpakara mbam mahịa, ma be kweru bnonu a nsni. ²⁷ Ọznarni zinu Chiokike nye nụ nsnunu a bụ nye akọ hite nụ Jizọsi Karaịsi ọkwukokwunu. Amịm.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89